



## საქართველოს გაერთიანებული სახელმწიფოს და სოფლის მეურნეობის მინისტრი

### ბრძანება N 2-1193

21/12/2020

ქ. თბილისი

**გარდაბნის მუნიციპალიტეტში, სოფ. სართიჭალის მიმდებარე ტერიტორიაზე მიწისქვეშა მტკნარი წყლის (წელიწადში 1 000 000 მ<sup>3</sup>) სამეწარმეო მიზნით მოპოვებაზე სკრინინგის გადაწყვეტილების შესახებ**

სსიპ წიაღის ეროვნული სააგენტოს მიერ, გზშ-ის საჭიროების დადგენის მიზნით, საქართველოს გარემოს დაცვისა და სოფლის მეურნეობის სამინისტროში წარმოდგენილია გარდაბნის მუნიციპალიტეტში, სოფ. სართიჭალის მიმდებარე ტერიტორიაზე სასარგებლო წიაღისეულის - წელიწადში 1 000 000 მ<sup>3</sup> მოცულობის მიწისქვეშა მტკნარი წყლის სამეწარმეო მიზნით მოპოვების სკრინინგის განცხადება.

წარმოდგენილი დოკუმენტაციით დგინდება, რომ სალიცენზიო ობიექტი მდებარეობს გარდაბნის მუნიციპალიტეტში, სოფ. სართიჭალის მიმდებარე ტერიტორიაზე, მდ. იორის მარცხენა ვაკე რელიეფის მქონე ჭალისზედა ტერასაზე ზღვის დონიდან 650-680 მეტრზე. ობიექტი წარმოდგენილია სამ უბნად და მოიცავს მიწისქვეშა წყალმიმღებ კომუნიკაციებს. პროექტის ფარგლებში დაგეგმილია სამეწარმეო მიზნით წელიწადში დაახლოებით 1 000 000 მ<sup>3</sup> მტკნარი წყლის მოპოვება. მტკნარი წყლის მოპოვება დაგეგმილია საგარეჯოს რაიონის სოფ. სათაფლესი არსებული ნუშის ბაღებისა და ერთწლიანი კულტურის მოსარწყავად.

სალიცენზიო ობიექტის უბნების გეოგრაფიული კოორდინატებია:

პირველი უბანი - X - 515384.0300, Y - 461956.8200; X - 515490.7800, Y - 4619131.6600; X - 515567.5000 Y - 4619082.7100; X - 515435.3800, Y - 4619018.7500; X - 515343.5300, Y - 4619120.4500; X - 515338.6000, Y - 4619223.2400;

მეორე უბანი - X - 515560.6300, Y - 4619032.1700; X - 515889.2400, Y - 4618820.2400; X - 515808.0400, Y - 4618739.4800; X - 515488.2500, Y - 4618969.6000;

მესამე უბანი - X - 515501.3600, Y - 4169252.0400; X - 515600.2900, Y - 4169273.8300; X - 515676.3000, Y - 4169121.7600; X - 515776.5300, Y - 4169005.5800; X - 515942.2900, Y - 4168947.4600; X - 516056.5000, Y - 4168853.0900; X - 515980.5200, Y - 4168764.6800; X - 515609.8400, Y - 4169031.7800;

უახლოესი დასახლებული პუნქტი სალიცენზიო ობიექტიდან დაშორებულია დაახლოებით 700 მეტრით. ობიექტიდან 25-30 მეტრზე ფიქსირდება პირუტყვის სადგომი, ხოლო მესამე უბნიდან 35-40 მეტრში მდებარეობს სანიაღვრე არხი.

ჰიდროგეოლოგიური დარაიონების მიხედვით, ობიექტი მიეკუთვნება ფოროვანი და ნაპრალოური წყლების იორი-შირაქის არტეზიულ აუზს. ძირითად წყალშემცველ

კომპლექსს წარმოადგენს დაუნაწევრებელი მეოთხეული ალუვიური ნალექები, რომლის სიმძლავრე 40-60 მეტრია, სამხრეთით კი მატულობს და 100 მეტრამდე აღწევს. ჰორიზონტი მაღალი წყალშემცველობით ხასიათდება და ხვედრითი დებიტი 1-1,5 ლ/წმ-ს შეადგენს. ჰორიზონტის კვება ხდება ატმოსფერული ნალექების ხარჯზე. ობიექტზე წყლის ტემპერატურა 9-12°C-ს შეადგენს.

ქიმიური შემადგენლობის თვალსაზრისით, წყლები ჰიდროკარბონატულ-კალციუმიანი ტიპისაა. საერთო მინერალიზაციის ხარისხი შეადგენს 0,8-0,92 გ/ლ-ს, pH – 7,65 – 8,2 და მათი გამოყენება შესაძლებელია სამეწარმეო დანიშნულებით. სკრინინგის განცხადების თანახმად, სალიცენზიო ობიექტის სანიტარული მდგომარეობა დამაკმაყოფილებელია. სალიცენზიო წყალაღების ზუსტი დებიტი უცნობია, თუმცა ჰორიზონტის წყალშემცველობის გათვალისწინებით, მოთხოვნილი 1 000 000 მ<sup>3</sup>/წელიწადში რაოდენობის ბუნებრივი რესურსი წარმოდგენილია P (პროგნოზული) კატეგორიით.

სკრინინგის განცხადების თანახმად, წყალმიმღები განლაგებულია მიწის ზედაპირიდან 1 მ სიღრმეზე. წყალაღების ტერიტორია შესწავლილია კომპლექსური ჰიდროგეოლოგიური და საინჟინრო-გეოლოგიური აგეგმვის სტადიაზე და სირთულის მიხედვით მიეკუთვნება I (მარტივ) კატეგორიას. წიაღით სარგებლობის ობიექტისა და მიმდებარე ტერიტორიის გეოდინამიკური სიტუაცია სტაბილურია. სკრინინგის განცხადების თანახმად, ჭაბურღილების განთავსების უბნებზე საშიში გეოლოგიური პროცესები არ შეინიშნება და საბადოს ექსპლუატაციის პროცესში გართულებები მოსალოდნელი არ არის. ობიექტი არ ხვდება სახელმწიფო ტყის ფონდის, დაცული ტერიტორიების, კულტურული მემკვიდრეობის ძეგლებთან სიახლოვეს და ტყით მჭიდროდ დაფარულ ტერიტორიაზე, სადაც გაბატონებულია წითელი ნუსხის ხე-მცენარეები.

სალიცენზიო წყალმიმღების სიახლოვეს მდებარეობს შპს „საქართველოს გაერთიანებული წყალმომარაგების კომპანიის“ ობიექტი. სსიპ წიაღის ეროვნული სააგენტოს მიერ წარმოდგენილია შპს „საქართველოს წყალმომარაგების კომპანიის“ წერილი, რომლის თანახმადაც, კომპანია თანახმაა, მოხდეს აღნიშნული სალიცენზიო ობიექტიდან 1 000 000 მ<sup>3</sup> მტკნარი წყლის გამოყენება იმ შემთხვევაში, თუკი ლიცენზიანტის მიერ არ მოხდება ტერიტორიაზე დამატებით (ტუმბოს მეშვეობით) წყლის მოპოვება. ამავე წერილის თანახმად, თუკი კომპანიის კუთვნილ N2 სათავე ნაგებობაში მოიკლებს წყლის ხარჯი, შპს „საქართველოს გაერთიანებული წყალმომარაგების კომპანიის“ მიმართვისთანავე ლიცენზიანტმა უნდა შეწყვიტოს საპროექტო ტერიტორიაზე სალიცენზიო საქმიანობა.

სკრინინგის განცხადებაში წარმოდგენილი დასკვნის თანახმად, სალიცენზიო ობიექტი საჭიროებს დასუფთავებას, ნარჩენების გატანას, მოშანდაკებასა და შემოღობვას.

ამასთან, სსიპ წიაღის ეროვნული სააგენტოს მიერ წარმოდგენილი დოკუმენტაციის მიხედვით, ვინაიდან სართიჭალის ალუვიური მიწისქვეშა წყლები აკმაყოფილებს სასმელი წყლის მოთხოვნებს და მომავალში მათი სასმელ-სამეურნეო და სამრეწველო ჩამოსხმის მიზნებისთვის გამოყენებაა შესაძლებელი, „წყლის შესახებ“ საქართველოს კანონის 53-ე მუხლის „გ“ პუნქტისა და საქართველოს მთავრობის N136 დადგენილების მიხედვით, ლიცენზიის ვადას განსაზღვრავს ლიცენზიის გამცემი ორგანო. სკრინინგის განცხადებაში წარმოდგენილი დასკვნებისა და რეკომენდაციის შესაბამისად, მიწისქვეშა წყლებზე სამეწარმეო დანიშნულებით ლიცენზიის გაცემის მაქსიმალურ ვადად განსაზღვრულია 5 წელი.

დაგეგმილი საქმიანობის სპეციფიკის გათვალისწინებით, ატმოსფერულ ჰაერზე ზემოქმედებას ადგილი არ ექნება. ასევე, აღსანიშნავია, რომ ჭაბურღილის ექსპლუატაცია

არ გამოიწვევს წყლისა და ნიადაგის დაბინძურებას და ხმაურს. ასევე არ არის მოსალოდნელი გარემოზე კუმულაციური ზემოქმედება.

„გარემოსდაცვითი შეფასების კოდექსის“ მე-7 მუხლის მე-5 ნაწილის შესაბამისად, სკრინინგის განცხადება გამოქვეყნდა სამინისტროს ოფიციალურ ვებგვერდზე და გარდაბნის მუნიციპალიტეტის მერიის საინფორმაციო დაფაზე. საზოგადოების მხრიდან აღნიშნულ საქმიანობასთან დაკავშირებით წერილობითი შენიშვნები და მოსაზრებები არ ყოფილა წარმოდგენილი.

სკრინინგის განცხადებით დგინდება, რომ გარდაბნის მუნიციპალიტეტში, სოფ. სართიჭალის მიმდებარე ტერიტორიაზე მიწისქვეშა მტკნარი წყლის მოპოვებას გარემოზე მნიშვნელოვანი ზემოქმედება არ ექნება.

**ზემოაღნიშნული კრიტერიუმების გათვალისწინებით, „გარემოსდაცვითი შეფასების კოდექსის“ მე-7 მუხლის მე-6 ნაწილის და ამავე კოდექსის II დანართის მე-2 პუნქტის 2.2 ქვეპუნქტის საფუძველზე,**

### **ვ ბ რ ძ ა ნ ე ბ:**

1. მიღებულ იქნეს სკრინინგის გადაწყვეტილება, რომ გარდაბნის მუნიციპალიტეტში, სოფ. სართიჭალის მიმდებარე ტერიტორიაზე მიწისქვეშა მტკნარი წყლის (წელიწადში 1 000 000 მ<sup>3</sup> ) სამეწარმეო მიზნით მოპოვება **არ დაეჭვმდებაროს** გარემოზე ზემოქმედების შეფასებას;
2. ლიცენზიის მფლობელი ვალდებულია „გარემოსდაცვითი შეფასების კოდექსის“ მე-7 მუხლის მე-8 ნაწილის შესაბამისად უზრუნველყოს გარემოსდაცვითი ტექნიკური რეგლამენტებით დადგენილი მოთხოვნებისა და გარემოსდაცვითი ნორმების დაცვა;
3. ბრძანება დაუყოვნებლივ გაეგზავნოს სსიპ წიაღის ეროვნულ სააგენტოს;
4. ბრძანება ძალაში შევიდეს სსიპ წიაღის ეროვნული სააგენტოს მიერ ამ ბრძანების გაცნობისთანავე;
5. სკრინინგის გადაწყვეტილების გაცემიდან 5 დღის ვადაში აღნიშნული გადაწყვეტილება განთავსდეს სამინისტროს ოფიციალურ ვებგვერდზე და გარდაბნის მუნიციპალიტეტის აღმასრულებელი ან/და წარმომადგენლობითი ორგანოს საინფორმაციო დაფაზე;
6. ბრძანება შეიძლება გასაჩივრდეს თბილისის საქალაქო სასამართლოს ადმინისტრაციულ საქმეთა კოლეგიაში (თბილისი, დ. აღმაშენებლის ხეივანი, მე-12 კმ. N6) მხარის მიერ მისი ოფიციალური წესით გაცნობის დღიდან ერთი თვის ვადაში.

ლევან დავითაშვილი



მინისტრის მოვალეობის შემსრულებელი